

晚晴移詩匯

晚晴移詩匯卷四十一目錄

彭孫適

十四首

倪燦

一首

張烈

一首

汪霏

二首

喬萊

三首

王頊齡

六首

李因篤

四十一首

秦松齡

十九首

周清原

二首

徐嘉炎

四首

陸棻

八首

馮勛

一首

錢中諧

一首

汪楫

十四首

袁佑

二十七首

湯斌

四首

邱象隨

五首

晚晴移詩匯卷四十一

徐世昌

彭孫通字駿孫號羨門海鹽人順治己亥進士康熙己未召試博學鴻詞第一授編修官至吏部侍郎有松

桂堂集

尤西堂曰羨門瀛臺賜宴詩七言一百韻盛矣麗矣使人茫乎望洋向若而歎然細尋之敘次周浹音節自然所謂人巧極天工錯者雖使揚馬復生猶當退避三舍何況餘子王漁洋曰南昌重建滕王閣落成名流競爲賦詩推彭少宰羨門擅場余喜識誦之謂劉文房郎君胄無以過也又題湖口向曰湖光盡日依樓堞山色終朝滿縣城亦足寫照沈歸愚曰羨門詩詞氣和平在唐人中最近大厯十子在十子中最近

文房

詩話羨門幼慧七歲詠鳳號神童既成進士爲推官罷歸已未大科名第一集中有寄內詩云小壘紅箋寄語頻橫雲初破遠山顰玉宸昨夜親承詔夫壻承恩第一人可見一時聲譽之盛晚年歸里嘗與子姪

九日登高賦詩得句云平生幾兩游山巖更不登臨
奈老何觀者訝其衰風不久謝世早年詩有南莊集
才氣尤盛倚聲時推獨步漁洋稱其
吹氣如蘭每當十郎輒自愧儔父

松下遣懷

秋意日寥廓暝色散微雨高風天外來吹我孤松樹翻然
落空翠澹與雲陰互杳冥寒濤生微聞滴香露幽人巖石
間抱此物外慕庶幾歲寒心聊以保遲暮

雨中過白芒村寄高山人儼

春陰生驟寒谿上無人蹟石筍清相羅翠煙紛可摘欲持
三尺絹寫此春山碧卻憶山中人遠在龍池宅惆悵不同
游白芒風雨夕

野田行

荒城日落生愁霧白骨青燐亂無數山河興廢多戰場宿

草淒涼泣狐兔悲風瑟瑟起白楊牛羊成羣上古墓人生
諒無百歲壽焉知生樂與死苦朱門華屋未解憂請君試
出野田路

越谿行

越來谿公莫渡行人隔水呼喚頻舟子掉頭不肯顧波平
如掌帆不前碧湖澄靜生寒煙縣官封船供應急經今一
月還復然公家用物有定數民間那得知其故日日官船
進女城依然船數不加盈昨聞大師至已泊南濠隈太守
親自出平明騎馬來官來猶自可兵來烈如火弓刀裝小
舸人馬乘大舸越來谿公莫渡捉船未已還捉人勸君慢
出城西路

陳白沙草書歌

白沙先生名早聞手擲青山歸白雲陳情上擬李令伯講
書欲方吳聘君晚年信手作大字落筆縱橫有奇致何必
規規王右軍淋漓時復成高寄世人好古如好龍可憐識
見多雷同豈知草聖固餘技相賞不在翰墨中

西洋琥珀酒船歌

海外良工擅奇思酒船制作窮珍異滑稽足傲鴟夷形淋
漓可使漉于醉宛轉玲瓏二尺長鏤金錯采巧莫當文珠
作窗玳瑁屋白銀爲蓬珊瑚檣酌酒五升帆半起帙船始
發春江裏引壺注滿飽欲張蓬蓬已可行千里長年三老
毛髮動鬚眉颯颯笑相視綺疏啟處中有人咬若芙蓉照
秋水須臾酒竭帆亦收回看堂上惟虛舟機緘動止那可
測見者疑同神鬼游此器徒聞出西域估客新從舶中得

由來奇巧汨人心不脛還能走中國對之三歎謝賈胡匏
尊一酌足自娛居奇漫直十家產適用豈若千金壺投珠
抵璧當代事雕鏤無益何爲乎

張都尉畫馬歌

汗血不出世但聞西極來披圖忽見渥洼產籜雲逐電相
縈迴立者驤首欲一鳴障泥未解猶徘徊走者勢如風雨
至馳驟百里無纖埃其餘數匹飲或齷一一神駿非凡材
問誰擅此化工技逸足天閑妙無比只今都尉最得名不
讓當年韓與李都尉生平本將家前朝曾領上輕車身親
百戰竟何益白頭歸種東陵瓜早歲壯懷時吐露伏櫪雄
心見豪素平沙漠漠落日黃馬首猶然蓄餘怒嗚呼黃金
之臺高突兀冀北之良恣超忽龍媒當世豈合無昭王已

往九方沒惟看阪上服鹽車誰向圖中求駿骨

維揚客舍送雲客兄北上予時亦有南越之行

湖水平隄炎雨歇風吹楊柳權歌發居人情重遠相送君
向長安我游越鼓枻中流自此行方舟並渡江恨平驛鐙
夜泊雲陽郭戍火朝明鐵甕城廣陵到日停舟處南北迢
遙各異路代馬還嘶塞北煙越禽自託天南樹只今已見
鯨鯢戮薄海銷兵佩黃犢時清豈合樂邱園親老還須營
斗祿日下翱翔多故人紛紛先據要路津致身遲速各有
會莫以外吏傷沈淪酌君卮酒君努力前路悠悠漫成憶
庾勝山頭少雁飛燕昭臺上空秋色驪駒催發不可留後
會須經春復秋兄弟相思五千里江湖此去一孤舟

望西山

太行千里脈疊嶂擁關門一雁分秋色雙雕落曉痕迴峯
沈日影飛瀑洗雲根望望空歸去幽奇好細論

當湖道中

夕眺高樓上林暉竟日清獨山秋戍冷三泖暮潮生漁火
中流見鷗波永夜明蘭橈須小住煙月正多情

白溝渡

渡頭沙草白離離過客停驂日暮時古戍煙荒吹野火寒
鴉風急戰枯枝河流遠合淖沱水驛路中分督亢陂欲問
霸圖銷歇盡朔雲千里不勝悲

望岱

玉簡金泥隱祕文至今佳氣積氤氲中天盤礴崇朝雨千
里輪囷大澤雲欲叩山靈探漢策遙披香霧禮元君時清

會有云亭典封禪遺編若箇聞

景州

城上風高白颭沙行人徙倚聽悲笳北連紫塞三千里南
接青齊十萬家暝色一行迷去騎寒天數點沒殘鴉年來
隨計燕山道幾度經過感歲華

秋日登滕王閣

客路逢秋思易傷江天煙景正蒼涼依然極浦生秋水終
古寒潮送夕陽高士幾回亭草綠梅仙一去嶺雲黃臨風
不見南來雁書札何由達豫章

倪燦字闇公江甯人康熙己未召試博學鴻詞授檢討

詩話開公晚達初中副車歷廿七年始獲鄉舉尋舉
鴻博授館職當時同舉五十人修明史升擢遷謫相
繼始終其事者寥寥晨星闇公在館凡九年爲最久
勤於編輯工書法常被詔作行草大書及小楷皆稱

旨其詩傳
者不多

送喬文和之劍州

渝峽遠通涪萬水嘉陵險接閬中山分符刺史初行部舊
語參軍正解蠻幢布芋田徵稅薄青松白鶴訟庭閒他年
更奏殊方績應在文翁伯仲間

張烈字武承號莊持大興籍東陽人康熙庚戌進士官
恩平知縣遷內閣中書己未召試博學鴻詞授編修
歷官贊善

自恩平還東陽途中作

嶺南解組一帆孤百粵山川入畫圖斫鱸盤堆沿路好持
螯興發此間無吟詩路近滕王閣看月舟停彭蠡湖貧宦
歸來書滿篋擬將詞賦走皇都

汪霽字朝采錢塘人康熙丙辰進士官行人己未召試
博學鴻詞授編修官至戶部侍郎

喜王露潛至自三峯

經時三徑爲誰開乾鵠聲中屐齒來久客奚囊多舊句貧
家尊酒只新醅不妨小住爲佳爾相顧狂歌亦壯哉晚節
最諳泉石味雲林深處好追陪

曾向南天把酒卮飛揚意氣更誰知千秋燕市悲歌侶一
卷松陵唱和詩海荔乍殘人散後江楓初老雁來時釣龍
臺上還山約及此幽尋也未遲

喬萊字子靜號石林寶應人康熙丁未進士己未召試
博學鴻詞授編修歷官侍讀有使粵集

詩話石林爭開濬海口新河竟廢其議爲時所稱因
之遭忌罷歸尋又召居京師亦因蜚語也詩有雄直

氣篇什甚富而自沈歸愚時已以
不見全集爲憾今則流傳愈罕矣

過應山弔楊忠烈公

嗚呼有明神宗之季國旣隳光宗繼之更短折維時先生
官給事顧命乃與大臣列防微肩鉅定大計選侍移宮一
朝決再起中丞赴雙闕大柄已被閹人竊乾兒義孫滿廟
廊二十四罪憤所切赤縣爭高宦者祠彤庭徧染中丞血
詎有婪贓楊大洪舍人甯死心如鐵或言漢之廚顧潔其
名唐之牛李營其穴宋之洛蜀明東林黨禍紛紛蹈覆轍
封疆已被門戶誤遂譏先生太激烈我謂此言殊不然藉
口保身附明哲假使當年稍婣婁張禹孔光更何別君子
豈能誤國家目爲黨人正氣絕嗚呼正氣絕國乃滅

下灘

湘南三月湘水生馳波跳沫空江鳴礚礚亂石互江面險
如瞿塘灩澦誰能攫我聞就下水之性豈樂與石相排爭
清流何爲輒暴怒鼎沸勢欲蒼厓傾其如灘石太嶮巖橫
排曲扼真難平篙竿之船薄如紙左旋右折中流行柁師
自許識趨避到此亦覺心魂驚十里五里在俄頃回頭不
見丹峯橫一灘纔過一灘至到耳總作奔雷聲縱然賦命
果窮薄毋乃太視波瀾輕

湘口

雁叫猿嘯不可聞零陵風雨正紛紛三巖明滅瀟湘合三
水滌洞楚粵分縱目好看靈嶽樹落帆猶帶隱山雲探幽
更向愚溪去野性偏宜鷗鷺羣

王頊齡字顓士一字容士號瑁湖晚號松喬老人江南

華亭人康熙丙辰進士官太常寺博士己未召試博學鴻詞授編修官至武英殿大學士雍正癸卯重宴鹿鳴加太子太傅贈太傅諡文恭有世恩堂詩集

詩話文恭弱冠卽負詩名其父農山侍御弟薛澱儼齋一門之內人各有集世豔稱之所爲詩規撫三唐不踰尺寸謹守法度中仍以閱博勝侍從經筵垂三十年故集中多感遇紀恩之作耄歲乞休賜詩跡與松喬合心緣啟沃留因自號松喬老人

九日登查山

仙山突兀海雲涼
令節登臨石徑荒
雙屐健尋瑤洞草
百年歡對菊花觴
金隄乍築蛟龍偃
玉笛橫吹鴻雁翔
更喜樓船休戰伐
漸看稻蟹足江鄉

送田遜菴少宗伯冊封靖藩使竣還朝

朱邸開南服
丹書下帝閭
周屏崇呂伋
漢柱重田郎
冊授

容臺長符分異姓王皇華今攬轡藜杖舊騰芒天祿尊劉
向儀曹得李剛雙鋒辭北闕八座山南荒菴岫楓初暗螺
江水正長風陰蕉葉嫩雨熱荔支香鳥道通冠蓋蠻方識
袞裳授圭贍虎節負弩拜龍章客對梁園月醴陳楚國觴
名藩叨雨露使節凜冰霜去擁相如傳歸輕陸賈裝吳山
堪歷覽越水暫徜徉孔李通門舊荀陳德曜光旌麾欣左
顧雞黍愧方將遠近驚星使殷勤話草堂山川歸太史風
俗紀江鄉去鷁秋濤迴迴懷阜蓋張三台原北極照耀紫
微傍

寶珠洞

濟勝芒鞋健窮幽古洞探奇松穿石罅絕壁插精藍鐘鼓
諸天靜風雲半嶺含蕭然塵世外應愧此瞿曇

閒坐

小窗閒坐幾多時。裊裊東風上鬢絲。閉戶且爲無事飲。看花亦算有情癡。世交翻覆同雲雨。朝局輸贏似奕棋。喜得先生春睡美。曉鐘雖打不曾知。

初秋遣興

邸舍幽偏亦我廬。綠葵紅蓼足圍蔬。門稀賓客新聞少。性懶衣裳造請疎。避事莫如千日醉。破閒但有一牀書。三年羈旅思歸切。盡道山中不易居。

西窗

門冷無殘客。官閒似散人。擬將詩送老。兼賴酒消春。雨潤桃花嫩。風搖蕙草新。猶愁雞肋絆。未得採江蓴。

李因篤字天生一字子德。富平籍。洪洞人。康熙己未召。

試博學鴻詞授檢討有受祺堂集

潘次耕曰天生關中豪傑人也自負經世之略無所
試一吐之於詩原本風騷出入古歌諸樂府而以少
陵爲宗意象蒼莽才力雄贍旣與冥合章法句法講
之尤精又慨世不乏才人爭能鬪巧日趨衰窳故甯
拙毋纖甯樸毋豐甯厚毋漓乍讀之不甚可喜沈吟
咀味意思深長王漁洋曰天生年三十棄諸生博
學強記十三經注疏尤極貫穿長律得少陵家法嘗
以四十韻贈曹秋岳曹歎曰數百年無此作矣又有
句云林谷關音
本乾坤老象才
詩話天生應徵出於敦迫授官後陳情乞養疏詞悽
惻世比之李令伯詩宗少陵於明代獨推二李有句
云雪嶺表齊幟北地本秦風絕構皆千古雄才有二
公雪嶺嘗抱日金翻久摩空薄晒看流輩江河逐漸
東具見淵源所自其胎息深厚本於樸學非馳騁其
華者比五七言近體純用杜法得其神理不僅襲其
皮毛長律贈曹秋岳一篇爲漁洋所推餘亦多傑作
詩集原缺第四卷未刊別裁集所載邊上一首當卽
中也

答孫隱君

大路迴且長崑崙杳殊域重華不可作帝望何由塞世變
紛相乘民勞日以亟積霖生塗潦眞宰久曠職饑溺如當
平敢云一士力其咨呼仁人孰是益與稷邈彼孫登游高
蹤眾莫識蒼蠅聞鳳噓大笑乃滋臧流俗好危言細儒工
外飾遵時在明哲抱道惟守嘿芝草歌漢恩蕨薇荷周德
贈予惟此語三歎奉嘉則

題世胄都指揮使崔公汝明象

高皇養士三百秋衛帥食恩等通侯銘鐘書帛列上第玉
案金罇羅羣羞一朝河上度櫓氛虎嘯嶠函不可聞赤幟
無色鼓聲死嬰城惟有崔將軍將軍開國世家子輕裘緩
帶談經史吹簫時過大司農

謂公兄抑菴尚書

北斗西豪俱在此

昭陽之冬月無陽野鬪豺虎色元黃決背不知有鋒刃疾

呼白日生冰霜臣矢已窮力戰久側身誓天不相負已拌
先灑侍中血甯料如生元帥首紛紛侍衛盡同朝今何裒
萎昔何驕朝行出攻暮不返歲寒松柏乃後凋後來傳疑
未傳信壺祠蠟墓無人問長留遺像天地間勇者成仁懦
者奮

過前中尉子斗先生舊第有感

碧瓦堂還在金閨籍已更萋萋秋草合慘慘暮霜明一老
悲劉向三閭弔屈平城南尋別墅轉託舊坊名

紀別

置酒歲云暮北堂生遠暉數鳥相與鳴寒風厲重闌慈母
就持箸欲言先歔歔出門尙無程問我何時歸遙遙計往
路歷歷詢征衣雨雪勤自保音書莫來稀長跪聞母言敢

不敏庶幾行役亦不遠歲時甯久違病妻扶下牀相視首
蓬飛謂我當引邁有淚不敢揮

弟從母側來再拜投一罌征駒鳴前庭擔負已出野僕夫
前致辭冉冉西日下要當慷慨去不覺淚如瀉兄言勤門
戶弟言慎車馬

小子復牽衣歧路含百慮不知行何方強欲偕我御念當
遠乖離那忍揮之去悲哉游子吟斯須哀樂具中懷如懸
旌搖搖不得住依依天屬親撫事愧童孺

永明奇后閣謁九蓮觀音爲神宗母孝定李太后恭
製長歌

太行西北山北來中有凌空之高臺月挂蒼巖龍虎嘯雲
生赤磧風雷哀千松萬松立窈窕十步五步行徘徊縱目

清涼在霄漢，樞衣靈鷲逼。蓮萊鷲嶺後，閤屹如峰九。蓮閣
中，瞻聖容，莊嚴具足，得未有草莽。何知爭爲恭，炎山忽飄
孤嶼雪。靜夜時落翠，微鐘秋色蒼。茫弔餘址，夕陽明滅懷。
故封神宗垂拱五十載，太后齋居多光彩。內啟祠嘗恩不
遺，旁搜象教力仍逮。五臺禪龕近京輔，兩宮敕賜兼鼎脩。
時移物換凋碧梧，篆冷灰飛逐滄海。出門惟睹白雪飛，澗
水松風聽不違。攀弓抱劍悲相向，鶴駕鸞旂久未歸。此剎
翻同靈光在他年，彷彿魂魄依君不見畫。壁金鋪光照眼，
貝花隱隱發靈機。

秋興

使節臨東路，軍糒及兩關。江湖輪輓闊，部領度支閒。水長
飛狐口，峯高落雁灣。壯游違舉步，秋氣苦催顏。

鎮朔城爲驛傳郵吏攝防兩河衝市暗羣草漫山黃犢挂
新耕壘鶯囀古戰場抱關遭所識曾與賦東光

復戶人誰是開荒野自如中原無竄草太府出新書帳聚
羣羌合煙移比屋疎每懷寬大詔重賄塞垣初

地下高田晚谿明暗水饒羽書時有至雷電日難調廣武
懸軍薄居庸遞馬遙客居逢歲儉林壑畏風颺

重憩雁門關

霓旌天半護烽臺鳥道雲迷望或開水擁南河吹日轉門
迎北斗過關來秦城萬仞徒空說漢騎千羣莫漫猜自昔
禁中煩拊髀將軍尤亟守邊才

遙嶺哀笳走塞陰磧亭搔首一沾襟羽書迢遞傳西北營
壘淒涼閱古今煙繞游絲春色瘡樹連飛翠夕陽深椎牛

射虎懷前史野廟殘碑入故林

得澄一書

春渚曾先雁北征旅途歸翼早長鳴書來塞上逢霜信客
在天涯對月明長俟河清憐趙壹漫嗟蘭馥怨張衡飛飛
預說來時道雪壓關山十日程

寄懷楊太舅白石先生

開元以降南雅墜五百餘年北地興步曹躡劉自跌蕩凌
鮑躁謝何峻嶒此時風氣首關內河岳翕然同向背壯藻
許西嘗競發新聲郭杜共酬對三子共擅宏德名五星重
瞻井鬼會最憐胎簪稱俊逸猶嘉昌穀絕倫輩後來宮商
頻動容天下傾耳待黃鐘援古特立漢京幟縱談曾標騷
賦宗厯下初難離阡陌瑯琊晚亦夾元白哀思一變爲楚

聲秀令千秋墮唐格遂有光祿起經學同時孝廉推詞伯
野卧微綸久寂寥公車老死空烜赫未見侯芭前卒業稀
聞羊陟過相索先生游處兩公間迴若片雲秋在山興至
不羈紅塵色吟成實助白雪顏遐寄曠攬愼攸託杜陵崕
峒非杳廓郡乘已舒五馬驂私田翻較諸生薄鮑叔仗義
多賙給陶公辭榮竟一壑傾家結客乃徒然閉戶攤書聊
足樂予溯淵源遵自出半生零落不具述惟桑與梓每繫
懷澗曲雲亭增洄潏咫尺東里尙書莊張公嶙峒南川太
宰坊孫恭介公侍御直聲追賈董楊忠介公中丞古調逼盧王李公
從遭兵戈盡散佚況復行役愁蒼茫恆嗟人倫違有道竊
幸戚黨及中郎世儒舉細遺者洪苛議悠悠挂英雄羣兒
疇昔輕韓信刮目誰今識呂蒙丈夫不早封萬戶華髮可

憐敝章句鼓箎屢沸屬國煙丁壯宿沈江湖霧舉帆遲擊
祖生楫眞誥且傳宏景注北歲太白晝垂鉞中宵槐檜占
失度行窮桃棘敝蟋蟀坐感蒹葭繁霜露夢裏猶嬉俎豆
家征途暫委諸侯路恭爲所親歌大耋努力加餐慰遲暮
寄朱學士滄起先生

宗邦懷舊德蟋蟀久悠然一老祝融裔千春姑射仙人才
推正始物望待承邊試問甘蔬食禪栖四十年

程義士嬰墓

國士蒸嘗闢孤墳意外逢碧生沿郭樹寒徹下方鐘谷勢
包甯武河流撼秀容郡人疏掌記遺恨滿西峰
藉地愁無似憑高淚不窮古渠移數壑新雨落雙虹故國
浮雲外中原蔓草中亂餘憶黃綺流汗浹臣躬

良鄉

王畿千里餘赤縣首三輔佳氣來閭闔去天如韋杜古時
封內地多以蕃同譜凡溫及應韓厯厯皆可數朔風日暮
急慘淡過戎伍二南有遺澤流恨兼今古附海無紉波附
岳無卑帖所以封泰山嘗先禪梁父約略計斯城初不下
萬戶胡爲兵戈中築堞失完土還聞東土人據地列田圃
白云託國家一一皆肺腑大兄侍中郎中兄司鹵簿季子
未拜恩鮮衣纏華組安坐召縣官促裝揖州府還家自生
光道上人如堵兼金舊絡馬百寶新裝弩貂首大秦珠可
充千萬估牛羊盈其門珠玉盈其廡堂上斗酒會健兒鳴
鐘鼓大婦工錦瑟中婦歌金縷小婦貴家子徐徐調鸚鵡
吾欲終此曲此曲聞者苦長安連狹邪日月通前浦

侍御鶴沖金公死難詩

朔風吹高林，頽浪日東逝。亂起如于風，他心何可制。當年
金直指，受命亂軍際。破產捍危城，捐軀先自誓。所志無依
違，天階有崇替。追攀三月弓，一體殉先帝。城下洞瀾水，湛
蘭清且厲。蛟螭不敢游，雨雪常相蔽。身前有君臣，身後有
伉儷。侍御畢命後夫人投繯姪婦孫婦侍女從死者三四輩附祀得三墳，纍纍還相
擬。嗚呼板蕩初，麟獲傷反袂。懦愚務苟隨，翻覺生死細。丈
夫重末路，吾道觀衰世。要當去取明，底論謀不濟。下馬拜
斯人，關河空灑涕。爲賦大招篇，自投流水瀼。春秋燂骨蕭
吉日迨邦祭，放悲靈之來。神哉般流睇，其下若風馬。北來
行甚銳，默坐眺八鄉。奚須環奇麗，四圍春草生。千載哀湍
閉死者長已矣，存者德音繼。吾愛孝廉公，謂侍御猶子蚪亭保孤

存本系嬰杵獲同心幽明事一例況復故司徒

侍御父司徒農公爲奉

先令至

宗邦多遺惠敝廬咫尺間聞政如魯衛直指西巡

狩秦天一再霽至今共伏臘先後垂棠碣悠悠吾所思乃在江海裔從泣戰城南美人空迢遞泣然登斯祠慷慨感深詣澄波旣終古皎月無年歲白雲著爲堂嘉夜著爲砌東西植梧桐左右種椒蔥上有雙鳳凰飛鳴何嘒嘒寄謝後來人聞風同勸勵

奉答約生表兄聞余過軍都

二雅淪胥久諸陵陟降懸書同西狩日客在北征年舊德留鄉社中人食祭田感君歌有淚遙灑白浮前魯衛無公族松楸有故枝尙懷行露意空及采蘋時歲久愁風雨天高冷夢思白雲俱不返遺恨鼎湖詩

席上呈傅徵君

江海英風老漸疎，菊松高枕送居諸。
野航慣載看山屐，春帖曾無乞米書。
燦燦紫芝存古調，番番黃髮長朋車。
兔爰中谷遙迴首，蝴蝶莊生各有初。

韓侯嶺

古屋荒林落照催，高歌酌酒獨徘徊。
苔嘗印虎秋還肅，柳只嘯鴉晚更哀。
敢謂蕭曹皆有命，愁同召呂一論才。
太史公云：周召太公之徒，後世血食矣。翻留血食村翁社，不爽明禋過客杯。

長至前二日同右吉翁山陪曹秋岳先生宿雁門關
卽事四十韻拈玉樹凋傷楓樹林之句分凋字

使者歸旌近雲州，去路遙部間催檣馬關下。
緩星輶折簡

俱相及披裘各見招佳人蒙夙契勝友得聯鑣野涸派溪

水

派音孤水名

風深荻岸橋荒陴依戰伐晚景媚漁樵漸蹠雙

厓底平臨萬仞標羊腸盤紫塞鵠卵插青霄日暮冰霜積

年豐伏臘調人家留戍壘供帳設山椒惜別寒溫略哀時

比興饒安危甯異想駕馭不同條天眷垂西顧民生脫大

僚

時新推秦晉總制非人

翻疑開府節只數侍中貂甸國奚芳藹江

雲竟寂寥

先移浙督後改

掄才喧此地授鉞憶先朝水旱紛猶昨

兵戈鬱未銷廟謨多慘淡公等尙風飈事豈和衷得恩將

使過要輿情違坦坦物論付囂囂半壁功誰就諸羌斃自

挑祁連猶舉火瀚海未通潮治化同緣木乘除比夢蕉薄

言秦駟鐵遺恨漢嫖姚

時西塞有疆事

撫跡懷難盡更端客重邀

壺觴移短榻棨戟壯寒宵地隘霑行騎山高響麗譙聞詩

矜越絕藉草出江瑤靜覺微薰轉頻添畫燭燒醉來吟不
次辭去卧無聊素志蹉跎失朱顏積漸凋空餘餐菊蕊悔
不學松喬已任顛毛換遲論髀肉消異方甘蠖伏吾道總
萍漂隔屋分旗鼓開窗逼斗杓健兒村外宿飢虎夜深驕
奔陸迴長馭和義近蓼蕭臨歧愁偃蹇後約待清韶執手
晨光發登車驟雪飄他年煩太史永紀雁門朝

登代州白人巖因飲孫園

萬仞懸孤嶂雙崖劃一門
好人多在野春水自依村
雨走空天角松藏老石根
危梯攀古洞彷彿說桃源

只覺前厓好何人並結廬
驚巖光倚薄香閣靜含虛
法境清涼外人煙戰伐餘
因聲寄遁社吾志在山居

舊年甯人先生以無妄繫濟南走書報我觸暑馳視

苦疾作辭還先生寄贈行三十韻詩春日晤保州
重會薊門奉答前詩廣五十韻

卧病三秋色懷人五岳情涼飈吹夢起啄雀喚愁生客返

關中路書傳歷下城

客秋有鄉人至自濟南拜先生書

倒衣初罷枕垂涕

復沾纓巷伯詩難讀梁園獄已平長吟歸黯淡別緒鬱縱

橫憶折前津柳同炊古寺羹

前年與先生同客慈仁寺予先別去

有孚謀且

窒無角兆先成遁道兼葭隔周行坎窞并莒萊矜野語虞

芮亂囂聲

訟起因小人奪先生田

歛擢江波大潛揚海汐輕

時訟廣株累多

人用已結海上事

羣疑紛所出眾口漫多驚智勇微夫子艱危詎

此行奮身甘下吏微服恥爲氓易豕繇斯昉騷歌比類明

經旬喧地圾舉國丐天晴

時地震淫雨

節至通蘋藻

先生難不廢時祭

愁來憶弟兄曾要肝膽契況忝雪霜盟草茆虛炎月雲高

隱暮旌罷呼燕市酒過決薊門程戍角迷丹嶂河陰護綠

蘄崩隄頻淖馬廢塢剩聞鶯水旱憂兼劇誅求慘自鳴

時道

多施亡別

此邦哀瑣尾何室厭香橙觸目難俱述驚時已

漸更馳聞瀛隰盡頗喜岱嵐迎膏沐誰遑理壺飧欲就傾

畏途晨上謁羈邸夜班荆續燭探行笥聯牀敞外楹年華

窮不減日錄老逾精

先生時成日知錄若干卷

恨失登山約嗟爲抱甕

貞徘徊違魯賻

劉六茹新故未能往弔

邂逅合秦箏

鄉人間天木閣以事滯山左閣

彷徨溟峻泉憐鈞突清

鈞突泉東有白雪樓

狂濤終砥柱直道益崢

嶸旅食悲寒及歸舟阻滌盈依然垂橐去率爾采薪嬰左

次才彌拙西還意若醒貧非荒竹徑渴豈慕金莖急難睽

良友端居惕遠征寸心如瀨落中夜幾屏營自得分魚素

空教怨鹿苹川原仍獨往伏臘互相衡甫定他鄉榻俄從

上日觥

先生以二月朔至

好音隨杖屨佳會足公卿律轉堅冰解

春迴早卉榮斂才期近物逃俗勵修名忽復追鞭弭還來

過帝京每詢邛邑樹誰薦廢園櫻

時在清明

進履耽逢石將詩

悚報瓊雍田關華好爲耦待躬耕

時先生與無異有華山卜築之約

酬程五周量

夙昔傾程蓋乾坤判楚才

時屈翁山寓程宅

迷方良夜雨薄祿故

人杯旅舍逢湯沐離宮入草萊前秋合歡扇一傍月明開

潼關

雲薄關門紫氣長帝樞曾此撼巖疆河經百二開天地華
枕西南鎖雍涼戍火忽移函谷月征車多帶灞亭霜舊京
蕭索垂千載飛輓何繇接巨航

望嶽

太華三峰列峻屏晴霄飛翠下空冥曉雲東抱關河紫秋色西來天地青玉女盆中寒落黛仙人掌上接明星亂餘林壑懷遺客縹緲幽棲賦采苓

贈高大扶南

大雪同辭漢苑鐘微霜已帶楚天松長臨玉樹憐車騎獨傍青雲美仲容雨散遠林明薜蘿江高秋水縱魚龍促裝聯榻經寒夕春酒杯浮琥珀濃

高歌行

寄程穆倩

江城正月黃鳥鳴有客清晨呼柴荆相見乃吾故人子朗如瓊樹玉山行別時五尺今八尺三載騰驤游公卿長跪起居動有禮藻華丹篆輝前楹我亦再拜讀來札高江波濤同激發自云流寓老益困中復採薪相摩戛鹽澤汗血

反蹉跎魯門鵲鵲誰識察忍餓恥爲稻粱計哀鳴徒仰霄
漢刷往者邛溝嗟賃春豪家睨視薄其傭陋巷經旬覆土
銓僧寮伏枕餐新松解質未敢惜長劍庭羸無時違短筇
形隻影孤窮安詣獨君橋梓數過從君有長歌二千字兩
京板蕩須臾事薤露傷逝足慷慨青蠅惡讒橫涕泗光芒
遺飛遑停吟微羽數變始滿志太和協律迴奇絕長慶尙
書何縱恣昔君早與吳橋游漳海清江俊及流回首太阿
倒奄豎蔓延關雒嘯鵠鵲九鼎卒移朋黨禍微霜深中杞
人憂禮失在野此最近詩亡於近將焉求晚年駘蕩竹西
久高卧何如鹿皮叟時湛彩筆拂雲煙徧揆遺文盡蝌蚪
大鏞石鼓忽同几犀劍環刀常在肘謫書韻跡出爭持丞
相中郎藉不朽琳瑯徑寸輕千緡約取猶難庇汝身貴戚

當前沉辭謝貧交接踵如飲醇未攜一絲坐相索傾帙堆
案皆所珍豈但室中生交謫鄰翁竊笑童僕嗔薄俗逐聲
寶康瓠黃鐘遺棄人罕顧山陽遂以工鍛聞正字終須碎
琴去滄洲躊躇獨往願白髮磬折諸侯路北眺故園隴樹
深東來春水江花暮卻送之子江之隅輕舟漾日歸東吳
內省殊慙報瓊玖相思且欲凌碧蕪夙知川拙見天性何
必雕蟲非壯夫片帆若訪曹秀水爲道蒼生望重蘇

答友見錫鬯垂示山左見懷之篇

燕市陳情客未還故人相見慰愁顏曾遲劍舄京華外前
歲至京值錫兄客通州未及晤卻賦榛苓海岱間存沒諸公皆斷梗亂離
九塞各嚴關尙須前箸呼閭闔西望白雲何處山

陳情後投上冢高陽相國

聖代垂裳日宗臣秉軸年安危殷獨倚作述儼相宣國體

光凝命家聲協象賢

謂先相國

先公堂載闢舊德史爭傳我李

貽謨大生民肇祀虔仙源遙溯隴望族久推燕履傍星辰
切膏蒙雨露偏沛豐原近漢韋杜並依天奮翮郎山迴濡
毫易水妍雅音兼宕激經術飽騰穿制策留深殿圖書賜
祕篇然藜堪炳閣發篋似流泉屢冠清班采平登上相躔
黑頭人競識黃髮卷彌堅正色羣僚右和衷獨座邊雍容
瞻物表敏捷洞幾先左序鐘初徹東方旭未延極宸森列
仗闔闔靜鳴鞭特詔趨承謹當時應對專至尊頻造膝長
日數移塵漸睹皇威霽難聞密語懸輪誠通肺腑布澤滿
輒擬往聚黔池甲俄高楚塞煙飛輪連棧騎剗障截江船
駭落狂濤莽歡來急羽駢奔猿甯假木涸鮒已盈筌勝算

揮師次英謀授廟塹那須名出己眞少議隨肩惠洽雕題
外功論汗馬前珥貂開七葉端珮領三蟬粵徼遲湮壘愼
陰且控弦敢求湯沐暇遑恤鬢絲鮮託契孚魚水賡歌靖
鎧鏃剛逢戎事肅早覺聘車聯小子何能賦愁吟亦可憐
總知窮自悔奚補壯多慙夙譽饒虛竊僉詢歛謬然苦辭
明發駕終挾遠游甌勢迫違慈母途歧戀別筵雪霜身契
關河海淚潺湲卸橐秋將暮居亭地屢遷炎暉行處猛夕
月幾回圓抱病仍趨闕臨軒勉受箋濫分倉庾米叨給度
支錢簞藻雖同及溫綸乃下詮爰忘蓬戶陋竟備石渠員
乞養要無已孤恩信有焉迴頭雙華阻舉目五雲連所恃
榮瓜瓞還勞苾葛縣恭期致堯舜錫類許矜全

蕭關城堞望中分，鹿苑干戈道上聞。
野霽卷蘆吹白日，霜清驅馬下黃雲。
征西盡撤三千戍，鎮朔遙歸十萬軍。
誰抱遺弓攀鶴表，賜冠空滿駿驥羣。

亭林先生寓曲沃卧病小愈走書相聞卽遣使起居奉詩

澗樹東連岳樹深，先生前寓華陰相思北接太行岑。
蒹葭儻觸居關興蟋蟀偏工入冀吟，世易繁霜應有道，天留碩果定何心。
晨星落落長蒿目，忍使尋盟負斷金。

王路風流縞帶長，霸圖聊託晉初鄉。
遺音西國思千里，老眼中原淚數行。
春逼夢隨池草綠，臘殘清引閣梅芳。
曾論微祀虛邊豆，許傍新宮自築堂。
先生有絢居雲臺觀朱子祠內

五十知非似醉醒，柴門寂寞晝長扃。
古人何可欺毛義，吾

道將無媿管甯幽俗好風吹舉趾漢時明月照傳經鳴車
整飾西歸日戶外寒融柳色青

題無異先生顧廬

學易中年自結廬衡門忽繫遠游車雙飛遂合延津劍萬
卷同歸遯世書逝水難留清漢老名山忍對白蓮疎還因
適館移新額淚灑西州寓目初

呈希制軍

使相分符十二州明公賜履冠諸侯天包涼益開東井地
跨關河領上游寒谷春生吹律徧野航時帶霽暉流躬耕
久自耽林壑望歲頻書大有秋

秦松齡字留仙號對巖無錫人順治乙未進士改庶吉
士授檢討罷歸康熙己未召試博學鴻詞復授檢討

歷官諭德有蒼峴山人集

詩話留仙爲小峴高祖年十九入翰林賦白鶴詩應制句云高鳴常向月善舞不迎人上顧左右曰此是有品者罷官後隱惠山之麓口與故人遺老唱和玉阮亭爲同年嘗緘詩一編寄之題曰寄阮集

送汪茗文入都時謫兵馬司指揮

省郎聞命返長安春色鄉關曉向寒輦下故人誰左掖東
吳名士半南冠豈緣罪累甘三黜莫以詩篇做一官我亦
如君不得意離筵落日酒杯寬

悟石軒翫月

高閣中夜坐攬此山上月目盡意未已移步向林樾碧草
色欲無朱華影俱白微火出上方清風吹片石人語漸不
聞吾心共幽閒靜理常在山浮生喜爲客清光永若茲芳
菲有消歇

恭紀

世祖皇帝遺事

千騎傳呼簇玉鞍
平明西苑朔風寒
合圍親射雙鵬落
不許降王仰面看

離宮閱武及初冬
清問還聞下九重
閩粵軍輸憂告匱
親將節省命司農

封章夕奏早批朱
清晝譚經到日晡
講幄新移弘德殿
天人稱絕董江都

御筆鍾王歎逼真
不將戈法借儒臣
親摹文敏書千幅
小璽朱鈴掌內人

桃源澗

斜陽歸曲澗
薜荔暗風吹
古墓人行少
深山葉落遲
看雲

心不動愛石坐常移去住成今古寒林應未知

錢礎日先生同吳門程彥明小飲齋中各以詩贈用韻奉答

輕風梅柳暗相催客到荒除破石苔此日一尊逢暮雨頻年雙淚對花開空堂木榻披書坐春水蘭舟問字來鐙火巖城知不禁須教明月照深杯

泊青浦

過眼青山失停橈落葉聞漁鐙明夕浦野鷺劃寒雲水氣孤城合人煙斷岸分不成尊酒興歸思竟紛紛

族祖按察公署中泠然亭小飲

暫作南州客招攜在綠池鄉心鐘度晚官閣雨來遲靜理風塵得孤懷骨肉知濃陰終日語卻似在家時

肥遯懷徐孺卑栖憶子真可知同醉客半是倦游人乍拂
簾旌燕將歸江渚身持尊向長者辛苦涉通津

秋水閣

山閣坐知久愛看秋水清萍開孤鶴過蓮墜小魚爭迴合
深林碧微添落照明未窮莊叟理圓對愧吾生

支泉

不自藏深谷因人度鬱盤映空仍皎潔潤物恐艱難林影
依山折溪聲挾雨寒那知流遠近還作二泉看

過岱下阻雪不得登

雪色凝空路百盤十年三過一登難鴛鴦那復勝驍豹俊
鵲何當借羽翰漢時秦碑思帝子金函玉檢記祠官誰知
泰岱春晴望轉作峩峩天半看

續和唐人惠山詩

出郭見山色日夕一青蒼清泉來玉洞更上漪瀾堂綆汲
無寒暑冠蓋紛游翔沾灑若春雪巖石生幽光始知耳目
異旋覺心脾香濟物固其性塵垢能相忘

春風吹山麓迴塘集游人山容自終古物情時與新草木
何華滋水石亦粼粼羅綺照樓閣白日凝香塵夕磬下林
杪翠羽歸青旻此時幽居者蕭然絕比鄰

白鶴來何方草堂多深樾清暎時一聞林巒自杳絕水檻
開素書坐看暮雲滅石磴落紅滿山頭吐明月風籟一壑
清道心中夜發莫使花盡掃高人有車轍

寒女歎

賣去結緣珠獨上流黃機織成雙鴛錦誰家作舞衣

燈火半明滅停梭聞歎聲誰知蓬鬢影舊日亦傾城

周清原字浣初一字雅楫號且朴又號蓉湖武進人監

生康熙己未召試博學鴻詞授檢討官至工部侍郎

有司空遺集

李敬堂曰海甯范文園善相人謂武進周清原吳江

徐鉉皆當不由科甲入翰林至己未同授檢討其言

果驗聖祖嘗稱青原

爲孝子御書孝經賜之

詩話蓉湖嘗言盛世文章當高華沈博不屑碎文瑣

義故詩亦多堂皇典麗長於應制集佚不傳僅見賜

宴詩冊及題畫一首鳳

羽豹斑聊存其概云

康熙二十年七月二十一日賜宴瀛臺兼頒綵幣蓮

藕恭紀百韻

上苑依丹禁秋光燦御筵恭逢宸讌日慶溢太平年池柳

籠初旭宮槐散曉煙津梁銀漢近臺殿翠微連共喜君恩

召遙隨中使傳濟蹌臨水檻覽眺坐樓船漸覺蘭橈動渾
疑錦纜牽波明浮采鷁槎汎挾飛仙檣轉文鸞舞鳧趨細
浪漩珠簾圍翡翠繡幄繪丹鉛苻帶翻風直荷珠拂棹圓
仙臺初顧盼瀛海試尋沿百道如瀟澗千株盡杞楨維舟
登輦路委珮肅官聯映日彤霞麗裁雲縵錦鮮機絲來夜
月袞繡簇連錢御帕遙籠處天章迴爛然攜供青玉案掩
映紫茸氈殊眷續紛下微名次第編上公先拜手百職盡
隨肩捧出榮光散頒來表裏全製衣將粲粲束帛各戔戔
名紙題還溼文縑看愈妍鴈行齊蹈舞綺席更明蠲花下
重茵布池頭綵幔褰人疑霄漢上坐傍水雲邊脯是麒麟
擘甌皆琬琰鑄和羹隨鼎鼐香氣雜蘭茝飯煮長腰米鱗
烹縮項鰻含情思在藻得意欲忘筌廣座容言笑長林喜

靜便簪從螭陛撤茗用鳳團煎飽德慚何補承恩未許還
徘徊同憩石徙倚更臨洲魚戲穿波出鷗閒結伴眠紅蕖
猶爛縵碧瀨自潺湲鼓腹蓬瀛側凝眸雲樹巔喬枝巢海
鶴古木噪秋蟬縱覽探芳徑澄懷淨俗緣來游歌豈弟素
食愧清漣皎皎臣心似溫溫勅語宣班行重接席珍錯復
加籩杯罍傳三殿壺漿下九天氤氲香作霧芬飴酒如泉
曼倩懷應滿相如渴已痊勸酬來近侍斟酌遣中涓盤捧
原承露杯深似吸川皇仁洵藹藹帝賚復惓惓燕笑于胥
樂威儀罔或愆稱觥多譽處交鬯共纏綿晝已勤三接榮
誠勝九遷歡呼靈沼畔盡醉至尊前耳熱猶端恪顏酡敬
折旋匪躬恆蹇蹇舉趾覺僂僂遠樹涼飈動遙峯落照懸
已叨金殿宴猶羨玉河蓮紫葭淩波細青房浥露堅託根

蟠太液擬壁產藍田翠蓋閒披拂瓊枝久蔓延弱莖芳芷
伴勁節素絲纏綽約姿偏豔珠璣實更駢倚風橫澡雪帶
月靜聯拳豈受污泥滓宜同沆瀣研菰蒲隨汎汎菱芡並
娟娟爰速蘭舟去羣將翠蒂攀懷珠初出水拱璧已盈阡
蕩漾停雙槳芬芳列八磚堆雲眞黶黶積翠更蔥芊寵命
何蕃錫分攜得自專朵頤知味美熨齒沐恩偏醉醕同懷
惠傾葵共勉旃敢云簪綵筆漫自理歸鞭鵠鷺還容與夔
龍任後先熙和情自洽踧踖步猶遘珍果盈懷袖縑緗壓
錦韉宴洵逾鎬洛功已奏黔滇萬里歸皇極千秋廣幅幘
西池無匿馬南詔有嘯鵠版籍全通貢岡陵永不騫武功
銘鼎卣文德靜戈鋌窮鳥猶堪憫哀鴻更足憐徵輸應暫
緩逋賦每常捐式廓皆甯宇安流已導畊休風蘇疾苦化

日起危顛咸凜天威肅還賡王道平虛衷勤訪洛講易獨
尊乾精一端心學危微闡祕詮淵衷窺邃穆至治顯陶甄
坐論追伊呂掄才簡許燕共知瞻主聖兼頌得臣賢民瘼
羣休噢官方正矯虔平章開黼黻搏擊去鷹鷂九穗嘉禾
實雙歧瑞麥稍簫韶常隱隱鼙鼓絕閭閻泣罪舒三網宏
封沂八埏騶虞游大澤麟趾應春暉交泰陳無逸從游賦
有卷章身榮纂組勵志凜禾塵雨露長承此涓埃尙闕焉
芻蕘陪獻頌愧比上林篇

題王麓臺見山圖

雲嶺千重水一灣幾家茅屋茂林間自從王宰題詩後不
用開門也見山

徐嘉炎字勝力號華隱嘉興人副貢康熙己未召試博

學鴻詞授檢討歷官內閣學士有抱經齋集

詩話華隱詩以才氣勝自謂始學初唐四傑中年肆力於青蓮右丞二家人都後間涉昌黎蘇陸蓋其寢饋既深途轍甚正吐屬故是不凡

丁巳新秋讌集李客部園亭送李南枝分符之武林
水精簾卷夜光浮蓮葉田田梧葉愁燕市離筵南浦月吳
山歸路驛亭秋客星已見雙辭闕鄉夢還驚獨倚樓醉踏
軒轅臺畔草丁香可解結綢繆

昭化寺古羅漢松歌贈蒼巖沈師

古松千年物寄跡空桑門仙人手攜綠玉杖飛來天際盤
雲根高臺蒼茫連崑崙紫煙青嶂浮黃昏湖山四望杳冥
邈亭亭翠蓋沈心魂我來披拂松上月濤聲萬壑何超忽
鳴絃響瀑來九天空中仙樂疑喧闐五城風雨歛而至脩

然欲拍洪崖肩春潭瓊草草色連冠霞裊露橫山巔人間
甲子幾滄海誰與草木齊長年奇峯飄飄層雲煙清暉娛
人憺忘旋深林霏霏蔽日月交柯雜沓迴芊緜松陰列坐
有道者吳門羈客人中仙神仙中人沈夫子當年廊落青
雲士五月披裘吳市中孤標迥出塵埃裏此地婆娑樂吾
眞偶然相對足相親功名若勝杯中酒越水吳山亦笑人
登鷹窠頂望海中夏蓋諸山

茲山展武地海上得朝宗梵剎馴歸鳥深潭隱毒龍朱霞
連越嶠翠蓋偃秦松南望諸峯在參差霧幾重

玉宸觀

深山樓閣擁仙官檜柏蒼蒼入殿寒廢井但從沙際識殘
碑多半雨中看鑪煙半拂黃金座雲氣晴低白玉壇福地

久傳人不到遺蹤何處覓眞丹

陸萊字次友號義山平湖入康熙丁未進士內祕書院
典籍已未召試博學鴻詞授編修歷官內閣學士有

雅坪集

詩話國初師下江南義山年十四從父未庵行避兵
未庵爲兵所得將加刃義山力求代乃俘以去越四
年未庵赴公車訪得之百鍰贖歸初以國學生授內
宏文院中書成進士遷內祕書院典籍復舉大科入
詞館詩有三唐矩矱伍鐵山
補其堅淨方雪岷稱其雄麗

自豐城抵萬安江水大漲

春江灌潦水百堵沒滄洲釜已游魚鼈涯難辨馬牛艣聲
來木杪帆影度城樓雙劍沈何處清宵起暮愁

度高嶺陳嶺

夙興越崇岡曉氣溼如露邱壑鬱迴抱登頓得坦步雖非

五丁鑿介然以成路云是高與陳名存迹非故茂草生峯
巔光風爲布溲蕩漾成微波渺若水雲遇嶙彼澗底松偃
伏歎遲暮

甯都西江

停車謝塵鞅晴江蕩柔艣中有雙魚浮似挾浪花舞層雲
吐新霞顏色美難數顥氣指東北劃然界蒼宇溪流忽如
斷夕陽在山左晚峯鬱深翠暮靄覆村塢隱隱聞雷聲孤
篷戛夜雨迴溪且停橈玉璜奏今古

雙魚洲巨浸不沒璜溪水聲如鳴玉

大風疾行二百里過馬當小孤

厲風擊水使倒流水聲怒立爲山邱六鼇並起翻滄海盤
渦鼎沸驅蛟蚪白日黯淡鬼神泣狂瀾震撼天地愁我行
江中歷旬月淹留飄泊心飢渴今朝一葉飛洪濤遂使形

神寄超忽陽侯鼓浪如共工層波相觸羣山空排沙裂岸
不可卻馬當橫絕居其衝上云太行險下云呂梁洪地勢
何太逼晝夜相交攻小孤嶸豎氣雄卓中流聲勢爲犄角
欲憑堅壁鎮驚譁難使滔天受約束乘船似乘駿馬行追
風躡影無塵聲復似修魚鼓鱗鬣任鉤巨錙何敢攫鳥翼
徘徊不能上商飈捲籜何其輕羲和轡已遲長江路盈咫
回首萬重山去若弦上矢不向壺公借碧龍那羨琴高騎
赤鯉

潁山鋪

騎出榛荆谷天開葭菼鄉藕花明萬頃漁艇入三湘脫帽
雙帘醉停鞍獨樹涼雖無采蓮曲逸興滿滄浪

大庾嶺

煙景曾無異兵戈鳥道荒千章松影碧五月稻花香漢使
征輶急秦關戍路長今宵應翦燭莫漫憶他鄉

泊瓜步

曾驚駭浪挾風驕擊楫重過一葉飄樹色明浮千頃月江
聲寒聽五更潮蓬萊紫日光應近橋李青山夢漸遙明發
征塵愁撲面中冷回憶舊茶寮

南安早發

春山寂寂片帆輕一路煙巒送客程最是斷腸聽不得杜
鵑花裏鷓鴣聲

馮勛字方寅長洲人康熙己未召試博學鴻詞授檢討
沈莊樗幽居

楊柳塘東更向東綠蒲紅蓼各成叢三家村口少人過獨

木橋邊有路通老屋短垣披薜荔主人長日注魚蟲客來
彷彿桃源內雞黍爲歡話古風

錢中諧字宮聲號庸亭昌平籍吳縣人順治戊戌進士
官瀘谿知縣康熙己未召試博學鴻詞授編修

少年

少年游俠五陵豪意氣如雲照錦袍寒鎖畫樓封荳蔻春
回別館醉葡萄慣拋金彈飛黃捷學舞龍泉太白高行樂
不須辭秉燭朱門臺榭易蓬蒿

汪楫字舟次號悔齋儀徵籍休甯人康熙己未召試博
學鴻詞授檢討歷官福建布政使有悔齋山間消寒
觀海京華諸集

詩話舟次使琉球爲其國撰孔子廟碑觀海一集卽
其時作也又撰中山沿革志使琉球雜錄以述其世

系沿革及山川風俗禮制頒行例有餽贈概卻不受
國人建御金亭志之四十年後復有使琉球者其國
禮制猶遵舟次所改訂有詩僧宗
實年七十餘尚誦舟次詩不輟云

贈別蕭尺木

七十遠爲客風流殊未衰自將蕭氏韻高唱杜陵詩世已
輕詞伯人猶重畫師黃金買毫素彷彿太平時

揚州難結夏六月上江船烈日蒲帆外清風野渡邊波平
思學釣稅急悔求田只惹妻孥怪看囊無一錢

西山紀游六百字呈同游施愚山少參高阮懷同學
西山蟠西江厥惟神仙宅窈冥三百里往往困游屐使君
發高興逝將飽經歷披悃告大吏休沐許三夕倉皇裹糗
糒折柬到逋客維時丁未秋正近重陽節天氣忽暄暖披
裘雜絺綌同調得三人無慮喧與寂側聞兵燹餘梵刹尙

踰百前期杳難窮惜陰慎所適香城山最險翠巖名尤赫
兩地騁夙懷循塗更探索稍行猶康莊漸遠得局蹐游絲
常冒面瘦藤能迸石絕巘恣盤紆緬懷巨靈擘逢樹競折
枝危徑寶輕策路迴失鄉導草偃尋人跡瞬息苦少暇大
水遽崩澍波濤滿空山平慎生恍惚碓屋結構牢造化及
瑣屑忽憶窮檐人質春形役役辛苦謀一飽觀此得無感
茅茨時復近犖确轉逾窄日落山花殷猶餘數峰赤逶迤
入靈境殿閣晃金碧衲子被長髮原委能具說伊昔典午
間雲公此卓錫寇至驚蒸黎焚香化雉堞至今山中人大
半是所活又云前山隅舊是猛虎穴道士張逍遙以杖逐
此物其人已羽化其廬尙突兀晨起尋遺蹤排雲踏山脊
巨崖落寒風颯颯蕩精魄石筍垂丹梯古洞立積鐵冬氣

周四時靈曜不得烈拂壁瞻畫像低徊難遽別暮經洪崖
井巉巖正飛雪只疑奔湍間仙馭同出沒溯流尋高源差
岬生蕩激一石尤倔強臨水自挺拔虛聲徧巖谷此輩恥
同列闡幽賴使君錫名補其闕恨無磨崖力排空立高碣
鐘鳴翠巖寺倚杖盡覽躋竭來丁酉霞嶺上傳丹訣僕夫
急長生賈勇待明發未見顏色好已忘筋力劣跂足盡重
繭颺舉爭健鵲山果不知名披荆競相掇陟險凡幾盤所
邁殊朴訥危坐無多言亦足滌煩熱偃蹇下山徑亂雲相
抵突霏霏出煙霧未雨道先滑蒼茫翠微裏何從辨虹霓
嗟余誤塵網毳毳見白髮丈夫不得志此身等蠛蠓神仙
吾所慕憂來不可輟山水且徜徉勝游頓提挈載筆陳此
詩聊以誌歲月

揭子宣過訪

奇人曰揭暄健翮恥飛翻斫地把三尺寫天能萬言好風
吹草屨細雨到柴門高論知何極相傾只酒尊

送張振九之永嘉司馬任

雁蕩山頭瀑絕奇藥公常爲我言之半天豈止五千仞空
谷無非風雨時司馬能書擘窠字停驂應勒紀游詩永嘉
烽火于今少王謝風流萬古師

題畫

十月山寒木葉稀霜華未散古苔肥藥房深閉客何處卧
聽空江老雁飛

送陳元水歸豐城有懷房興公明府

此老歸然在長眉掩淚痕一生家屢破萬死舌猶存已忘

他鄉苦應知吾道尊臨邛有賢主日日款柴門

贈別吳舫翁

汪生三載螺川客臨去才知吳舫翁風雨齊生雙腕下炊
煙獨絕萬山中如君自不依劉表今日何從得孔融顧我
將鬚還大笑雲龍此際又西東

新安道中二十韻

已逐黃塵老初爲故國行計程隨逆旅問俗媿諸生頓頓
春新穀村村護舊塋建旗看屋峻鑑髮得溪清險莫驚新
嶺行當慎考阮人煙愁處絕衰草望中平曉日迎過渡輕
風送出城天心藏暮雨冬氣發初晴徑轉逢樵唱山幽憶
鳥鳴忽驚蒼樹斷知有白雲橫稻草盤空挂松毛近火擎
林深霜作色溪響碓無聲阡陌隨山曲陂塘待雨盈勞人

下擔急健婦把鋤輕野宿惟防虎山城竟賣鯖西江時轉
粟南國人停鉦作者聞傳詔三方盡撤兵雲帆朝不至葑
屋夜常驚幾見東家飽先愁小市爭曝芹誰許獻桑梓最
含情

漸江墓

畫師墓上百株梅盡是當年密友栽山徑風高吹半折花
時更得幾人來

中山七夕次石來韻

他鄉七夕今年好放眼能窮萬里天白露自零官燭外銀
河直下海雲邊拂竿不見珊瑚樹登組真成玳瑁筵聞道
弓衣有人織興酣寫與布頭牋

馬耕田歌

中山山多稻田寡耕不見牛時見馬曳犁負輓當町畦編
草絡頭泥沒髀噴沫徒憐氣凋喪踟躕安知材盡下王良
伯樂無時無不待悲鳴淚先灑側聞洪武開國時曾來此
地求騶驪連檣累舶動千匹購買不惜傾高貲陟險衝波
有底急每繙舊史常懷疑維時布衣起江左渙號止及東
南陲壯士健兒恣騰蹕步卒敢向中原窺圍人太僕但充
位登牀厭穀皆虛詞誰歟忽建鑿空計外廐祇藉長風吹
飄飄遠致列雲錦騎出奚啻熊與羆永辭絕域騁皇路寸
長一技皆得施不走沙場繫畎畝吁嗟爾馬生何遲今制
三年兩入貢使者執鞭大夫控天子垂裳顧日嘻此物何
煩跨海送異域從教寶騶驢天家絕不求麟鳳終老邱園
何足惜竟辱泥塗亦堪痛吁嗟爾馬無自傷不逢湯武逢

虞唐縱有龍媒四十萬中山只作華山陽

題五子樽酒論文圖

謂北王幼華來江東與吳野人孫豹人郝羽吉及棋交命曰五

友繪圖以歸分賦

汪子無才負傲骨尋常出門少親暱僻壤相逢吳野人風
塵意氣膠投漆野人之友亦落落論詩共許孫與郝幾處
歌聲向一鐙吳陵新安與焦穫焦穫自昔多名家孫郎動
向人前誇眼中難見李叔則戶外忽來王幼華王生結交
殊不苟屈指素心惟五友預愁他日走長安不似於今時
聚首西湖戴蒼能寫眞游子不顧囊中貧卻將渭北江東
意圖成樽酒共論文更有黃山江天際畫水畫石多生氣
援筆添寫兩株松百尺寒岡接蒼翠裝來卷軸喜同看皓
首孫郎酒不乾郝子撚鬚時欲笑吳生抱膝動長歎汪子

把卷苦抑鬱王生惜別何辛酸王生王生勸爾且盡樽前
歡明日徒從紙上觀

長史鄭洪良以王命請余畫像留國中口占答之

豈是中朝第一流偶持龍節拂麟洲大名那得齊諸葛遺
像何勞比益州稍喜文章堪報國誰憑骨相取封侯靈臺
一片真難狀多謝傳神顧虎頭

袁佑字杜少號霽軒東明人康熙壬子拔貢官內閣中

書已未召試博學鴻詞授編修歷官中允有雪軒集

詩話毛大可與杜少同在史館自言每日分牘起草
日落必撤筆相對吟一詩然後騎馬出東華門其詩
風骨峻上不敢偶佚繩檢長垣御雪嵐謂所爲詩率
本至性旨趣原於風雅體凡數變每變益工往往絲
竹繁會中授簡揮毫灑灑數千
言立就加一唱三歎歸於雋永

寄贈孫徵君

游魚有殊趣鳴鳥有殊音羣士紛逐名先生獨見心志匪
慕巢山而乃終山林我欲往從之山水何高深

月下懷友

亭虛偏受月來往獨思君晚飯饑仍嬾秋碓遠更聞寡營
常採藥多病久離羣不有桓譚出誰能識子雲

病中與諸友

病至眞無謂憂來不可名花飛春日色雁帶故園聲卜築
同巢父尋仙得廣成何當驅二豎好向泰山行

早發七里河

慈親望子至行役敢蹉跎曉色千家樹秋聲七里河亂螢
隨月度高雁傍星過幾處丹山裏如聞白石歌

與汗朱言別

思鄉當十月歸馬帶霜寒野館同相憶河流各自看著書
應閉戶閱世好加餐暫坐休辭醉離亭柿葉丹

抵舍

搖落悲秋暮空山又掩扉虛名知己在盛世壯心違九月
茱萸酒十年蘿薜衣愁顏難自解不爲羨輕肥

行城南魚窩道中

渡河村落少南北訝晨星鵲怖依禪樹鷗閒宿野亭寒梅
深破臘凍柳遠含青浩蕩知春近農歌漸可聽

秋霽漫興

登樓開霽色遠近一蟬鳴溼竹含雲氣晴梧作雨聲詩從
憂旱廢病自入秋輕閒讀巢由傳斯人已市名

行舊城道中

故人垂釣處踏雨問前期黃葉三秋路蒼煙五禮碑閒雲
同客意健鳥趁秋時放眼滄波上樓船唱竹枝

淩玉又有遠行得書念之

我亦求田舍君仍滯道塗盛名多坎壈野館半榛蕪賦穩
新詩句愁深舊酒壚一年纔一見歲月望中徂

秋霽和崔玉階太史韻

積雨今方歇晴開九月秋星光明水岸樹影挂山樓尙作
他鄉客依然昨夜愁西南多戰伐何處不關憂

初春登北閣送張潛庵游臨潼

暫對河橋酒春城柳色新蕭條廉吏後飄泊遠游人挂棹
方辭越驅車又向秦故園同逆旅回首欲沾巾

汝有探奇癖西來興自賒人情隨道路春色著鶯花韋曲

多詩侶新豐半酒家
朝朝逢折柳忍住在天涯
歸程應不遠想在麥花秋
客路粉榆社家園杜若洲
曉風吹夢蝶春樹聽鳴鳩
酒伴君能訪終南有醉侯

春日游水月庵

溪橋晴日好渡水問珠林
曉樹浮煙出春城帶雪陰
鷗驚游子夢花發定僧心
命僕攜農具閒聽扣角吟

送友人南旋

野棠初放綠送子近河橋
此地輕離別何年慰寂寥
岸雲迷曉樹江雨入春潮
應有北來信高天雁影遙

棠棣坡

野樹無邊闊蕭蕭一徑穿
石叢留虎蹟沙外見人煙
魚販三家市鴻飛八月天
老農閒剝棗遲客汲山泉

別同學諸君

依依花下酒忽復泣沾巾久客懷鄉土將歸戀故人雪霜
千里道貧賤一生身此去黃河岸愁看舊釣綸

送錢子璧還江南

別酒臨高館歸人值暮秋山川桃竹杖雨雪木蘭舟開閣
懸青眼還家戀白頭吳梅花早發遠折問離愁

濟南雜興

山勢平臨近水亭白鷗白鷺滿沙汀柳條待雨仍含凍麥
意違春未放青翼北九方能識馬濟南一老自傳經夜來
風起連城響伏枕關心不可聽

月夜游秋水橋岸

藕花短短葦花齊漁艇秋煙草閣西出寺溪雲隨意遠過

橋山月趁人低藏書對客常九藥載酒尋僧獨杖藜砧杵
不聞千戶靜蕭蕭城闕夜烏嘯

酬梁芝三吏部

角巾獨買碧山居人羨山公啟事餘詞賦近題梁苑雪音
書遣寄汴河魚幾年帝里輕回馭何日王門敢曳裾見說
鶯嘯曾有約片帆春雨到衡廬

九日登舊城用曹秋岳侍郎韻

歸路鄉心折大刀還從此地醉葡萄雲深野壑魚龍寂風
急空林鶴鶴高僧閣雙扉連土壘人家十里餽山醪紉蘭
忽漫思公子落帽溪前自讀騷

飲幼輿齋中賦和

獨鶴盤雲下九皋西風杖屨肯辭勞陶潛自種當門柳仲

蔚無妨滿徑蒿日薄長林留晚照夜深急雨落秋濤相期
共載匡山酒笑指丹崖翠壁高

凌玉去燕游晉歸以詩見贈賦此奉酬

殘菊重陽一醉回虞卿飄泊正堪哀入春詩夢池中草落
日書傳壠上梅綠野依然游子去青山無恙故人來五雲
北望天高處知是黃金郭隗臺

秋日雜興

棗邊柳邊木耳生稻稭畦外小船行量晴野老方愁雨多
少荒陂不可耕

長門怨

沈沈宮漏夜無聲半捲珠簾見月明譜出霓裳供奉曲避
人花下自吹笙

湯斌字孔伯號荆峴一號潛庵睢州人順治壬辰進士
改庶吉士授檢討累官江西嶺北道康熙己未召試
博學鴻詞授侍講官至工部尙書諡文正從祀孔廟
有潛庵遺藁

詩話潛庵師事夏峯爲姚江之學而亦推崇洛閩持
論最爲平實值鴻博大科應試之作乃斐然可觀亦
講學家所罕有也詩無意求工
自然雅澹固是有德者之言

贈李映碧先生

蚤年登朝著端笏拜彤闈抗疏表孤忠旭日麗黃扉維時
甘陵部南北勢相違正色兩不阿嶽嶽世所希元祐盛名
賢黨論多是非元黃未息戰國是將安歸惟有哲人在秉
道還識幾石室留諫草夢回尙依稀

魯國遺經火口傳賴伏生九十秦博士典謨亦已明文獻

歸靈光斗杓示景行著述藏名嶽大義何崢嶸虎觀待鴻
儒丹詔下江城老夫難趨走豈敢抗弓旌抽書授使者卷
軸滿巨簾白雲封巖谷時聞鸞鳳聲

向歆嗣經學彪固續漢史世業重蘭臺千秋誰繼美先生
令子賢載筆石渠裏文藻曜朝華持論平如水眾人驚未
聞庭訓實爾爾余也衰朽姿追隨愧迂鄙南望東海濱丹
霞明若綺願言從執鞭廁身堂廡底恨無鴻鵠翼翻飛平
原里

西來庵贈水齋上人

上人舊爲
甯夏總兵

白馬西來掃野雲居人誰識舊將軍楞嚴讀罷焚香坐一
鉢江泉到夜分

邱象隨字季貞江南山陽人拔貢康熙己未召試博學

鴻詞授檢討歷官洗馬有西山紀年集

詩話季貞與兄曙戒大理象升並有才名時號二邱漁洋賞其處州山中詩西風黃葉無人徑破廟山神對古松之句謂穰穰入市者不知世有此境

渡魯明江

混混無崖岸中流別魯明蕭條人不見澎湃水空縈自適當年意誰期後世名翻憐陵谷事嗚咽聽江聲

過武勝關

驅馬雄關上中原獨俯臨靈山龍窟遠淮水朗陵深一道開南北千尋峙古今從來形勝地空復繫人心

榮澤渡河

驛路傷新鬼心驚古戰場爭名連廣武分地限滎陽落照林煙白吹沙野渡黃可憐天上水空爲客蒼茫

金華道中

一徑煙雲鳥道還，高盤如黛越中山。
不知過盡山多少，猶在嘒猿萬木間。

贈程穆倩

病後相逢邗水涯，歲寒雪壓客廬斜。
縱然淡盡人間事，又寫青山過酒家。

晚晴繆詩匯卷四十一終